

12 APR 2003

Zainuddin-Perhubungan

TADBIR URUS PERHUBUNGAN AWAM HARUS DITINGKATKAN, KATA ZAINUDDIN

KUALA LUMPUR, 12 April (Bernama) -- Timbalan Menteri Penerangan Datuk Zainuddin Maidin berkata tadbir urus perhubungan awam di Malaysia harus di pertingkatkan dalam menyampaikan maklumat yang tepat.

Katanya kepakaran dalam bidang perhubungan awam mampu menaikkan atau menjatuhkan sesebuah negara.

"Pada masa ini negara menghadapi cabaran getir daripada tohmahan media asing khususnya dalam membuat liputan mengenai isu-isu semasa negara sama ada isu tempatan, serantau atau antarabangsa," katanya.

Zainuddin berkata demikian ketika menyampaikan ucapan pada majlis perasmian bengkel "Ke Arah Peningkatan Tadbir Urus Perhubungan Awam" anjuran kementeriannya, Jabatan Perkhidmatan Penerangan, dan Institut Perhubungan Awam Malaysia, di sini hari ini.

Menurutnya, liputan yang berat sebelah itu memberi kesan yang mendalam kepada imej kepimpinan negara dan persepsi dunia luar terhadap Malaysia.

Beliau memberi beberapa contoh terkini, antaranya liputan media barat yang tidak menghiraukan ucapan Perdana Menteri Datuk Seri Dr Mahathir Mohamad semasa Persidangan Pergerakan Negara-Negara Berkecuali (NAM) ke-13 baru-baru ini.

Zainuddin berkata ketika persidangan itu akhbar Australia khususnya telah memberi gambaran negatif dengan menyiarkan laporan antaranya bertajuk "Global Bad Boys Gather For Godfest" dan "Dark Corners Reject US Policy Countdown To War".

"Oleh itu menjadi tugas dan tanggungjawab pegawai perhubungan untuk mendapatkan maklumat yang tepat berasaskan kepada fakta kajian yang berwibawa untuk disalurkan kepada "stakeholder" untuk menangkis tohmahan ini.

"Seterusnya untuk mendapatkan maklumat, saluran maklumat memerlukan rangkaian hubungan dan seterusnya menganalisis fakta serta menyalurkan fakta ini ke sasaran yang tertentu," katanya.

Dengan proses globalisasi sekarang, katanya, profesion perhubungan awam telah berkembang dengan memainkan peranan strategik dalam hubungan pelaburan kewangan, komunikasi pekerja, melobi untuk kerajaan, pengurusan isu, membina hubungan komuniti dan pengurusan krisis.

"Para pengamal hubungan awam harus memainkan peranan sebagai pakar pengubab, pemudah perhubungan, pemudah bagi menyelesaikan masalah dan juruteknik komunikasi pada situasi kerja harian," katanya.

-- BERNAMA

MAS ERE DC ZB